

Pemuda Umno kutuk tindakan Tian Chua

BH, 7-7-2007
KUALA LUMPUR: Pergerakan Pemuda Umno mengutuk sekeras-kerasnya perbuatan biadap dan tidak bertanggung-jawab Ketua Penerangan Parti Keadilan Rakyat (PKR), Tian Chua yang menyiarkan gambar palsu mengaitkan Timbalan Perdana Menteri, Datuk Seri Najib Razak dengan wanita Mongolia, Altantuya Shaaribu di blog webnya.

Ketua Pemuda Umno, Datuk Seri Hishammuddin Hussein, dalam kenyataan yang dikeluarkan di sini, semalam, berkata perbuatan Tian Chua yang berunsur fitnah dan hasutan itu dengan jelas mencerminkan sikap pemimpin PKR lain yang turut bersekongkol dan sanggup melakukan apa saja, termasuk membelakangkan kebenaran dan keadilan demi kepentingan politik sempit mereka.

"Tian Chua yang sering menggunakan NGO (pertubuhan bukan kerajaan) asing dan tempatan untuk menghentam pemimpin kita serta memburuk-burukkan negara, kali ini sudah keterlaluan dan kurang ajar apabila membuat pengakuan dengan angkuh (yang beliau menyiarkan gambar palsu itu) tetapi enggan untuk memohon maaf," kata Hishammuddin dalam kenyataan yang dikeluarkan di sini, semalam.

Beliau berkata, PKR ternyata tidak menghormati kedaulatan undang-undang dan perlembagaan negara serta rakyat Malaysia.

Oleh itu, katanya, perbuatan terkutuk itu wajar dikenakan tindakan keras oleh pihak berkuasa.

Hishammuddin menyifatkan perbuatan buruk Tian Chua sebagai usaha PKR untuk mengalih pandangan rakyat mengenai masalah dalaman parti itu, terutama masalah tidak sehaluan pemimpin PKR dengan penasihat parti itu, Datuk Seri Anwar Ibrahim.

"Masalah ini kian parah dengan peletakan jawatan Ezam Mohd Nor (bekas Ketua Angkatan Muda PKR) diikuti beberapa pemimpin dari Selangor dan Kedah," kata Hishammuddin.